

四庫全書

集部

欽定四庫全書

昌谷集卷十八

宋 曹彥約 撰

墓誌

黃公墓誌銘

通判公墓有誌銘太府寺丞灝以族人之誼許論譔矣
未幾寺丞守漕廣右詔趣行甚亟秉筆未竟而通判公
之葬卜日已定其勢不能走數千里介以請乃俾某述
其大畧先納諸壙按南康軍都昌縣土塘黃氏分派于

江州湖口縣之沙谿自沙谿而下至通判公纔六世其族蕃衍星居兩郡者不下十族多者輒數十家而土塘之族號為最盛則公高祖居士拱實啟之也居士居鄉有盛德貲財百萬漫不以加意賑窮恤乏無所不盡其力後有倣釋氏之說作龍華會以召天下信士聞風而來無不滿意傾困倒廩不計也人皆以居士稱之至于今未改生子寔能世其業號小居士為土塘族祖小居士生子可累薦試春官不第教子詩禮不使為科舉碌碌

計後贈朝散大夫大夫生汀州使君武汀州生通判公
公諱瓌字少蘇又字繼蘇汀州之長子也母封氏封太
恭人初汀州有四方志以奇節自許當建炎中興初投
匭論兩河事宜召問中書即布衣授招討司幹辦贊大
名軍與平劇賊田知古招洺州叛人王江等有奇功薦
於朝未報去之會李成寇江州特自外奮入圍城又告
急行在所見謂過計及遣兵往救不及事朝廷旰食乃
上書論軍國利害對執政慨慷憤發為時論所服高宗

奇其才授承務郎知黃州黃岡縣歷婺州義烏縣丞擢
知郴州又知汀州與秦丞相不合奉祠十餘年不為屈
通判公初受遺澤中乾道七年銓選調德安府孝感縣
主簿秩滿調光化軍司理叅軍以薦者改宣教郎知江
州德安縣通判江陵府丁太恭人憂服闋授潮州通判
未赴以疾自請得主管台州崇道觀嘉泰二年十二月
己未卒於家享年六十有七官至朝奉郎公賦性簡淡
不事表襮事父母為令子處諸弟為賢昆與人交和易

平直人不知其有立遇事耿耿勢位不能奪當官治民
一意不擾鴈驚行不以為便思有以撓之不可得也孝
感本無職業惟奉諸臺差檄未嘗少暇以剋刷錢糧委
之輒不稱意至剖決獄訟予奪產業則皆服其寬平莫
能加損在光化四年未嘗以陞改介意貴游子弟恃陰
撓政守以下皆避其鋒公執法正爰書不為少屈大家
豪奪民田莫辨其偽公視印文不合上其姦狀闔郡嗟
異舊城在漢水北與敵界錯居得闌入愚民即欲置死

公言此皆中原赤子非姦細不可殺獄遲久不上遂得
末減累政皆信其賢爭推薦之令資政殿大學士趙公
彥逾總餉湖廣知其舉將溢格猶以公名劾上且曰吾
寧壞一舉削秩不可失一賢者故工部侍郎顏公度為轉
運副使以收拾孤寒自許時連歲不擢職司部內有常
員皆不得磨勘顏公初入境意已屬公公受代即辭去
無顧望色顏公亟薦之德安新減民租會一歲乏供數
且萬緡公下車適遭其會用度不給州家循習泛敷迫

使取諸民不肯奉命曹掾官有所誅求又不供億姑舍
怒媒孽欲連坐佐貳公言此知縣罪不當旁及廣座肆
言無所畏避邑民亦誦言不可勢未敢發遣郡吏物色
帑藏無一毫私意俸祿外餐錢未嘗以例取其計遂屈
顧已檄入郡郭不可中輟俾攝事僉幕以便郡政佐貳
理邑事眡州家風旨敲扑深入骨髓宜治辦井井反不
如前時邑民走諸臺願終得黃佛子乃已州家始不自
安乃還舊物大資政趙公帥蜀召還過郡得其事津津

有喜色又貽書從慫之且言堅忍以事上官盡力以恤百姓舉賢如此可以無負在邑幾年終始如一旁觀若不如意後有改其涂轍立致禍敗公論亦且不與好學未嘗廢簡冊適意即自賦詩不可強也平居安坐靜室不以世俗事介意戶庭之外至旬月不一出所居州縣守令有滿去不得一見遇賓客契合飲酒奕棋陶然自得真樂於接物者官滿俸輒盡無求田問舍意往來都昌湖口間或寓南康城下惟意所欲娶曹氏實彥約

之姑子男三人渭溱洎皆能有立渭嘗以鄉老獻書登
於天府女三人長適同官子蔣椿文雅有賢譽次適彥
約其次則彥約弟彥繼孫男五人枹棟楠栢樗女八人
皆未有所適諸孤將以四年十一月辛酉葬於湖口縣
五石山之北青山觜之下前事十三日而來告期得渭
所書族譜與蔣椿所親見德安事實乃參以平日所聞
撮其梗槩以志不朽至若為銘為表刻諸堅珉立于墓
道以利其嗣人則寺丞事也乃為之銘曰百世之下知

通判黃公之葬在此起敬起愛有不可已如其表墓以俟君子

黃子通墓誌銘

黃子通處選調三十年無進意口不道求薦事使者與好事者皆切歎服又極力推導之頗有端緒未聞其疾苦也竇慶改元之明年歲在丙戌時重午節享家廟奉親歡無廢事明日得疾即以屬纊告享年纔六十有一聞其名見其面目者顧無識則已耳稍有識則莫不短

氣太息甚至投淚不已蓋其為人天稟渾厚父母曰吾
賢子妻曰賢夫弟妹曰賢兄達於宗族親戚朋友鄉黨
賑貧乏助婚嫁力所可及靡不殫盡則又皆賢其行雖
本郡太守薦士於朝則亦首稱其素以為不可及也平
居闢便坐之室列前輩遺訓于左右聞善言善行必手
自抄記反覆展玩躬而行之惟恐不合居官善待士不
擾其民讞獄務平允議政主寬厚攝他職不食其俸謹
出納不取其贏外不事表襮而人推其才進不由科舉

而人稱其學其言也似訥其行也似緩而其主盟正論
檢杞吏姦有萬牛不可挽者初以寧宗登極恩授將仕
郎入銓等為安慶府太湖尉兩調處池二州皆為法掾
池守雅服其才及改擢王人亟以賓客舉辟倚婉畫為
重行公道於帑廩間異時恃苞苴假氣勢者無所措其
手所更歷纔若此而其所抱負者不可量也昔西坡先生
從晦庵朱文公游立朝耿耿不負所學持使者節以蠲
租救荒得罪時論居閒累年不自辯其是否賢士大夫

見之而心醉子通克肖其德人之敬之者猶其敬西坡也與弟建昌軍錄事參軍枯遠宦奉親更主家務叔出季處人無間言至是枯來奔喪奉以歸葬將以是年十一月庚申訖大事於星子縣清泉鄉大磧方家嶺之原以友人胡泳狀來謁銘不可辭也按南康軍都昌縣黃氏派出於江州湖口縣之沙港地迫都昌故都昌多大族西坡諱灝故任朝散大夫廣西路轉運判官娶高氏武顯大夫汝翼女年踰八袞今封宜人西坡之考諱唐

俊故任左文林郎温州平陽縣丞贈太中大夫娶伍氏
贈碩人平陽府君之考諱澤隱德不仕娶魏氏伍氏自
平陽而下徙居大寧其上則族處松蘿皆都昌也西坡
晚居城下今三十年子通諱杭乃朱文公所命兩娶陳
氏皆池州通判柅之女亦皆前卒一男子充將仕郎女
適光州陳使君椅之子熺請銘之曰擁腫漫山世豈無
材木心不正將焉用哉折楊載路世豈無聲一八里耳
啾啾炫名誰與及物焚券棄責外雖強名中有德色議

論磊落神沒鬼出算計見效百不及一賢哉子通粹然
德容聲宏形厚大呂黃鍾孰不養親子通養志孰不持
身子通守義表裏洞達內方外寬以此治家以此居官
官則不顯我亦無求死生夜旦何短何修持此歸報西
坡先生無世間累有身後名

黃承議墓誌銘

閣學苗尚書既薨僅一歲而通判君亦即世君於尚書
為長嗣賢而以孝聞造物者奪之驟莫名其說其適然

耶其哀毀過節而益其疾耶哀毀固有之矣事亦有適然相值者然而家失令子宦路失賢士大夫眇然人物之時老成既已凋喪蘄然俊偉者又復淪沒可為短氣也已君諱策字子長曾大父諱彥輔故從事郎知吉州吉水縣娶李氏大父諱去華累贈太中大夫娶周氏贈淑人是生尚書公尚書公諱疇若入朝為禮部尚書去國為煥章閣學士爵至豫章郡侯贈宣奉大夫出入藩從家有傳國有史通判君幼而岐嶷少長業舉子既壯

以父任得官自承務郎轉至承議郎自成都安撫司書
寫機宜文字改簽書劔南東川節度判官知吉州泰和
縣通判潭州以憂去官而屬續及之矣太和多士之地
又多巨室令稍不自愛雖自愛而弱不能立或少不更
事則吏民持其柄不敢孰何君剖決肯綮既有以服其
心正辭理財自酒課一事撿杞弊蠹沛然贍足無所欠
闕然後寬租賦弛市征紓民力而通商賈惟意所欲以
至葺治庠序選補雋秀職業所該靡一不舉長沙會府

征調浩穰闕決之事視他郡為重適時板築以才選獨
任其勞旬月訖事公私若無聞知增募飛虎卒亦得專
任其事取其勇力善鬪不問所從來提舉酒務增釀城
外白酒兩庫取以給軍皆獲其利此其發於事業如此
至其脫穎絕塵則又有不可及者方北騎闖邊朝論慮
調度不繼稍行鬻爵法給官資以下州縣責以期程且
水旱間作又給僧牒以助濟貸亦急於售名項雜出不
得已而及於民強者乘勢方命弱者無以自解胥吏旁

緣為姦所至搏手名為禮請其實抑配強之以盃酌雜之以械繫雖以無道行之終不得其要領君時在泰和獨能深思熟慮謀於泮宮託之士子度其事力可者更相勸誘文移無所施鴈鷺無所與鬻爵鬻僧所求皆集一時守令未有出是奇者予幸得備數帥守親聞其事即以君姓名上聞諸臺亦先後剡上屬方急賢謂且清切矣求便親待次乃得潭倅以其所處觀其所就疑得壽而顯者聞訃而歸即忽忽不自持以至大故平生恬

於進取不以超躐動其心當調劔南職官時總餉者招以幕府辭避不受在長沙遇寶赦例當進秩遲留弗請聞親病遂不果上致其階不至郎宿非不遇也生於乾道之癸巳卒嘉定之癸未享年五十有一娶熊氏同邑進士所之女江西安撫司幹辦公事方之曾孫子男四人端卿良卿敏卿厚卿皆力學能文端卿當受尚書公謝事恩命孫一男五女家世隆興府之外邑初居分寧與雙井同譜七世祖遷豐城沈江自高祖而下四世賜

第者凡八人遂為豐城第一族望諸孤將以甲申閏八月丙申葬於新建縣南陽小象牙山之原而端卿書來乞銘予既受尚書公深知又與通判君接官僚高其名而騰其實矣義不可辭乃為之銘曰其行也恂恂懷經綸也其政也肫肫銷頑嚚也進而循循尊其身也處而泯泯存其真也有祿而顰恐羸其民無疾而呻歸不見其親其蘊莫伸當泰而屯死從其先人求仁得仁

蕭孺人黃氏墓誌銘

孺人江夏黃氏諱敏之孫諱良弓之女嫁河南蕭氏為
朝散大夫諱固之介婦郢州通判諱之美之配黃與蕭
本江州湖口著姓地與南康軍都昌之境接其族大遂
為兩郡之望黃氏代為文章家教女四德孺人早失怙恃
猶能博覽羣書番兩藏經手抄盈帙往往多成誦通判
公舉進士於南康既錫太常第與其兄祭酒公居湖口
里中聚落齊家以和涖官以正鄉黨無間言子孫有義
方則孺人實內助之孺人諱德方初以淳熙己亥該恩

受封至癸卯而通判公即世後十四年以慶元丙辰八月二十日卒享年七十有一子男二人顏顏孫男五人九齡九思九疇九成九儀通判公無恙時顏以鄉貢試禮部今雖未遇人多奇之頗與諸孫亦莫不博聞強識駸駸乎達矣女二人長適迪功郎澧州司法參軍游逢次適進士黃滂皆前卒孫女六人長適進士曹士肅五人尚幼其年十二月庚申將祔於湖口小桂山通判公之墓屬某以銘某黃所自出也孺人為母行及某壻于

蕭氏而女兄先執顏箕箒故歲時得進拜識通判公家
法矣通判公與孺人既淹貫古今履德蹈善官滿俸輒
盡不治生業子孫男女無長幼一讀書即解其義遇平
居無事時每使之次第而坐舉簡冊以為告戒嬉笑談
論不出諸此其子孫男女雖襁褓韶齒率皆應答如流
與其父祖同趣尚以是為樂更歲月如一日也理義昭
徹於其心富貴不動乎其外通判公與孺人皆上下七
十歲未嘗有疾痛疴癢召醫問藥奄然屬遺誠而逝視

世俗役於利者當何如哉銘曰粟也不可以耐久玉也
不可以世有讀古人書采撫其膏腴得其平可以齊物
而一死生行其德可以自家而刑國既培而春以利其
嗣人

黃氏夫人墓誌銘

安陸之屬孝感有賢縣官愛民同其政退食自公二人
相視而笑莫逆於心遂相與為昏姻宰蔣公諱元龍有
子參字季長端慤修潔擇簿公嫡長女為之配則黃氏

也諱惟淑字順師世為南康軍都昌人贈朝散大夫諱
可之曾孫女朝散郎知汀州諱武之孫女朝奉郎潮州
通判諱瓌安人曹氏之女年十有九歸于蔣氏有婦言
婦德得舅姑意以沒其世蔣氏家本莆田居京口已二
代遷徙無定所季長終鮮兄弟闕手足之助外家申國
呂也僑寓九江與南康共廬山而近以二族故卜築于
山之陽家無饒財順師守以儉雅好詩禮有家法以教
子無嫉妬以待下開禧丁卯春得季長書來古沔言蔣

氏家不幸順師去年十二月癸亥得暴下疾醫環視縮
手自晨至午忽為古人年四十九耳喪已踰月將以三
月某日葬于城西南四十里定岡田舍蓋為我誌而銘
之順師余之姑女又室人女兄也接屋而居知其事審
矣有子三人忠已授室壽年幾冠其幼未名銘之曰將
氏盛時門望業我及其西遷家道洽和絃誦詠歌克宜
其家其人則良內助亦多天方薦瘥逝者如波賢否一
間生死同科昔往曷從布淞斯河今歸曷安廬阜之阿

其死盛年其德不磨鶴髮有親蒼天奈何

姪女曹氏墓誌銘

介江州南康間居多族語親戚之盛不絕者稱曹黃
豈惟二姓雖他族大者喜談之不以為忤謂其締好久
而尋盟數也黃雖望江夏中徙豫章由豫章占沙港為江
州湖口人曹望譙國徙宣城又徙龜山實今都昌境上
兩姓聚族事不在本朝或十世或十餘世少者亦數十
家多至百家兩郡號稱兩道而沙港龜山相距乃十餘

里其地近故其俗同其嫁娶多故其情益密又有星分
而出派別而居者故今土塘黃氏以沙港大支表表于
都昌者又同邑焉吾家自吾先君大夫至吾兄弟以至
諸子若孫行娶于黃者已六人土塘過其半吾姑又土
塘婦迄今壽且顯故吾姪女曹氏執箕箒土塘其良人淮
字季海朝散大夫諱可之曾孫隱德諱肇之孫饒州贈
軍諱瑄之長子此曹氏者吾兄粹父諱彥純止有此女
在諸弟上吾先君諱興宗止識此孫生鄂州司理官舍

自吾母宜人已鍾愛不與諸孫等又以適其族人故吾母實親送之其為人明達聰敏以簡冊為日用如吾父善理衆務以禮法為準則如吾母其母又京西李機宜諱知幾女也其樂道人善恥言人過如吾兄與其外祖平時若不解事人遇事有處理分別人所不及逮事舅姑和易恭敬居喪嚴整內外言限以閭親戚間至相指示真儒家女榮及吾族居姊姒之長共財而不見其迹上下百口無不歸心又能如李海之志生男子三人曰

臬曰浩然曰集訓以義方皆有場屋聲令鄉老以浩然
獻天府漸有著效嘉定己巳念吾嫂氏年老實來歸寧
居若干日得疾若干日而卒實某月某日也季海歸其
喪上塘越明年某月某日葬于某鄉某山之原以吾官
長沙來赴以日謁銘地遠執筆不暇揭之墓左亦可以
傳不朽銘曰曹大家作誠常懼黜辱傷諸女適人不憂
子穀懼失容他門取恥宗族恭惟吾皇妣日誦斯語以
其所已行示訓諸女又以及其孫俾蹈規矩若金玉長

孫凜凜受命如敬戒所言以順為正德厚者流光必有餘慶肆齊家有則律已不瑕宜君子偕老委委蛇蛇不五十其年命也奈何

梅坡孺人曹氏墓誌銘

孺人曹氏梅坡彭先生繼室南康都昌人先生有二子其伯曰文其季曰方文既蚤世方以經學魁省闈多士為池與揚二郡校官作邑于復之景陵而孺人已歿於其葬也方以狀述其德以告於孺人從弟某而使銘焉

狀之言曰孺人賦性明達遇事有特見嚴御下而終之以慈儉應物而斷之以禮方與女兄皆前妣陳氏所自出人無間言歲時饋問親戚必以潁川外族為首居家以理使方可移于官頃分教時皆得奉安輿菽水獨景陵稟命先往未及謁告而訃且至矣方不忍言也嗚呼此豈待方言之而後信耶先生與孺人同里而居其大父昔同舍而處政和對大廷又同年而第其聲氣習尚非一朝一夕之積矣孺人踰可嫁之年更十餘歲先生中

道喪陳氏以子方有聲場屋而太安人秦氏年事已高
資于內助者甚重得此賢配德義相安孺人以婦道事
秦氏終其養以妻道事先生畢其敬以母道撫其子即
場屋成名為時賢士大夫使其道井井歲計之而有餘
撫方之女兄與方之四男子二女治生有經習讀有程
律已有則人不知其為先生繼室也先生之大父諱圖
南終淮寧府校官考諱時中隱德不仕先生初諱蠡後
以小字行諱鳳孺人之大父諱省終雍丘丞考諱一夔

終信豐丞此皆方與某所共知者昔雍丘公懇惻為民以直道忤林靈素得罪久廢靖康初政欲顯拔而峻用之值寇至不果信豐公以師道居鄉里持論嚴正後生不浴德者不敢過其前世守剛毅至好賢樂善乃不翅已得先生根柢學問馳騁筆力與信豐公先後設教學者共仰其立言制行見于某昔所誌墓者已備故孺人見聞嫻習一意禮法靜專有立為曹氏賢女至母儀于彭氏厥有端緒此則方與某之所共聞而某尤審生于

紹興之丁丑卒于嘉定之壬申既卒之明年而方以九日丙午卜葬從先生於南山之側曹總塘之原請銘之曰為養娶妻賢子盡職歡飲承志賢子職得為子求母察父任責慈孝曲盡察父責塞泛觀薄海繼室千億成則寂寥敗者襮積孰使之然憎愛戈戟孰使之然見聞淺窄孺人名門敬戒薰炙作配先生詩禮勅敵妻道以正匪徐勿亟為婦為母兩臻其極二姓合好一家壽脈心正身修可以治國其人則亡其效愈力君子于此可

以觀德

從兄雲夢縣尉墓誌銘

紹興戊辰歲鄉郡大歉穀斗直三百民疲於奔命吾家
百里之內含哺鼓腹熙熙如有年則吾祖雙桂居士之
所為也居士以仁術自生居多積粟歲值不偶粒食踊
貴獨能下其直之半與斯人共之五日一啟廩趨之者
如堵墻於是設規制審次序率衆子弟與僕窮日力給
之坐待遲久又資以食莫不舉手加額祝其子若孫後

數十年猶見戴白扶杖者指屋以相語也晦庵朱先生
賑淳熙庚子旱亦訪其規制次序為郡縣賑濟法雲夢
尉兄生戊辰歲尚漸漬前人意度磊磊落落不拘譎以
徇俗學舉子業不就改肄弓馬既成不復用親課耕桑
有倍稱之入用計然餘術亦足以雄長一時然好施與
尚氣義不儲累月食屢瀕於困苦終不少貶與人言不
假詞色其初多不快意及患難相卹無不盡其力鄉人
善士與夫游官賢者下至小夫賤隸刀筆吏走卒聞其

姓名莫不忻然道之有所緩急爭倚以為重理家務以井井教子皆入秋賦識義方當開禧丙寅多事時荆湖宣撫使招致豪傑士有意官之版授迪功郎德安府雲夢縣尉間一歲改元嘉定年六十一復至戊辰以沒不問知其有志之士溢於才而不見於用者也吾家親與從凋落甚矣自二父即世以來門戶不競已久兄弟八人支桂單盡不絕如帶僅至今日中間多難物故者蓋半觸事感懷已不堪舉似今又弱一个而其人物氣宇

又屹屹不碌碌豈惟一家雖生乎吾郡與別業乎旁州
以此見稱於輩行者有數得一命不果仕而其名著見
於人有如此者泛觀於時亦未易屈指多計也家世南
康都昌人卒于江州朝宗門外之別業曾大父諱充妣
段氏大父諱敦禮是為雙桂居士妣段氏陳氏考諱紹
宗號環山居士妣劉氏累世饒於德不偶於官至吾父
朝散公始登進士第曾大父嘗有蓄財盡掩暴客之手
鄉人為不平得主名與贓狀俱至則曰是貧使然耳手

釋其縛有惡少被酒承之以戈因而遣之翌日來謝或
以為不可貸則曰是醉使然耳終不復問大父弱冠謝
場屋立居家準繩一門雍睦至奔走備使令者皆可倚
仗取其子而教之有文士稱如戊辰下粟直啟廩事特
其一也考隱淪基酒未嘗揖有位之士娶王氏子男五
人
士恭士章士文士龍士達女五人長適進士李然其
次早卒餘在室士恭將以已巳某月某日葬于都昌太
平鄉小港里之原請銘之曰瞻彼蒼蒼歲登不穰嗟我

懷人雙桂古堂瞻彼明明歲登不平嗟我懷人雲夢尉
兄指雙桂之屋行道有福得孫而賢衆所屬目蓋尉兄
之棺天道不還歲同執徐雲黯夢山謂筮決疑謂禱扶
危指事問天天且弗知謂炊必熟謂種必粟事久問天
天從人欲

蕭景淵墓誌銘

高宗肇開中興南渡十餘年始無敵冠士風彬彬復承
平之舊矣南康上賢能書二蕭兄相輝競秀當時士子

少有出其右者長公諱之敏明年登進士第由州縣入
朝執法憲府至權小宗伯又真為成均掌醇誠實忠蓋
載在國史其季諱之美續斷賢科改秩作縣以最書課
既僉書荆門幕府又倅郢州官府劣於其兄而聲譽實
相似誌二難之墓故相益國周公廣陵為公實司其筆
立言顯顯固足以取信天下後世倅公有賢子而景淵
實為之長某年十七時女兄之次得主景淵饋館于吾
家者甚久明年景淵與某各薦于鄉同隨計吏則掌醇

公實貳春官又明年某壻于蕭氏與景淵游處益久審其
為人自少年隨侍宦游習慣二父志寤寐經史至先朝
名公著述皆成誦不錯一字議論醇正識前輩氣骨二
公深佳賞之作詩純熟雖不事彫琢詞意和緩有風雅
體掌醕公將漕湖南即席命作長短句膾炙嘆詠常不
置口字畫造坡仙八法過荊州聞于湖善作懸筆立造
其妙豫章見向巨源與論鍾王本末益深信之雖疾病
沉綿操管或戰掉得其竿牘者尚藏以為寶典則森嚴

無一毫不穩處儼如其人非識者不心服也若其孝友
出於稟賦德義見於操履安貧樂善泰然自得雖古之
逸民何以加諸昔掌醕公以直道聞友愛至篤猶言吾
弟介甚恐不利於俗常翼蔽之掌醕公之直不可以復
加矣鄉人往往舉似深言其介倅公以介得名如此而
其子履道視前修無媿如其不利於有司不偶於世用
抑其末也嘉定改元之五載年六十有八矣三日戊午
微若感疾嬉笑對家人語若將不復言者則怪而問之

應曰昔吾父屬纊時洋洋如平時日及今言之尚盡吾志也乃安卧而歿倅公終承議郎其配孺人黃氏博通載籍有婦女德某嘗聞女兄言倅公燕處時每與黃氏坐堂上命諸子與其婦若女悉坐其偶泛論是日簡冊所見與觸事對景悉以正理隱括黃氏贊言如響表裏往哲嬉笑必於是飲食必於是其聞見執手如此其家井井至今猶一日倅公之考諱固贈朝散大夫妣彭氏封宜人大夫之考諱仲山妣徐氏景淵諱顏此其字也

子男四人九齡九思九疇九成皆肄進士業女五人亦
為進士曹士肅劉劉李日勤劉燧黃拭妻九齡與適劉
劉女皆先卒按蕭氏本江州湖口人以上世葬南康得
散處兩郡或屬邑獨倅公始終居劉市最近其族景淵
無改焉既歿之明年諸孤將以十一月甲申葬于彭澤
鄉漕湖山榭林之原以女兒命來謁銘也銘之曰冠裳
相因世侈其盛枚數官涂閥閱輝映名溢于私爵襲于
朝外略一律中蘊實枵孰如治中克配其兄子名其家

天錫之慶巖巖前修我昌厥後亦或繼我反復之道視
漕斯湖有壇非堵勤銘幽宮尚告來者

朝奉大夫主管崇禧觀蕭君墓誌銘

崇禧蕭君諱必簡字季然贈朝散大夫諱固宜人彭氏
之曾孫朝奉朝祕閣修撰贈朝散大夫諱之敏太恭人
項氏之孫贈奉直大夫諱顥恭人劉氏之長子以修撰
公遺澤補將仕郎年二十一赴淳熙丙午春銓入等授
迪功郎寧國府南陵縣主簿秩滿調郴州司理叅軍遭

外艱去職服闋差湖州長興縣合溪酒官合溪為提領
所辟客曩時主者以貴游自處往往遙領不至以鶚冠
攝職釀政不修逋欠山積君下車親履其事奉行月令
六物靡有差忒曾未滿歲績以最奏宰邑者苛於關市
民旅病之初立機穽旁及近郊白其事於郡將猶未能
革乃使與聞彈壓悉杞吏姦民無橫擾事亦不廢未滿
又遭內艱服闋用薦者改秩知紹興府山陰縣縣近輦
下調度繁急事力單弱不與他邑比赴調者不敢問而

君獨以為天下無難事欣然飛舄會成肅皇后上仙當
應辦宿頓之任變出非常尤更膠轕卒無闕事亦不病
民復土奏功訖得優賞秩滿到闕差通判興化軍先世
怨家當道尼不使赴改通判均州時邊防故多房陵與
光化關守攝事主諾居無寧日蜀帥聞其賢辟通判金
州荆帥不忍其去改辟通判襄陽府未兩月選知郢州
房在萬山中舟楫所不能達正供所貢以白金易泉貨
初以為利其後金值益昂券值益廣較前所償何止三

倍官不能辦取足於胥胥又不足取足於民郡僻且陋
莫敢訴者君獨叫號總饗告急諸臺利害痛徹遂復其
舊郢迫近邊境郡計仰給權酤鼎立三庫官吏冗糶本
息單寡所費日廣所入日薄君定計併省合而為一蠹
斃既去經費乃饒始議郡郭狹隘緩急難守其外東南
面百餘步坡阜反高俯瞰城內勢若窺井在昔嘗建堡
寨而基址曠遠不可固守開禧被敵寇直據其上城中
洵懼幾廢汲鑿前守李國錄誠之按視裁縮欲板築不

果君至即議成其事以至訖役高以二丈周以千步城
門樓櫓皆如州郭釣橋羊馬墻儼若對敵又念民熟干
戈易致苟簡俎豆之事漫不留意乃撤新大成殿宇增
撥公田以助養育以其貢士有莊又撥田以增其費休
聲上徹擢提舉京西南路常平茶鹽公事兼本路提刑
運判朝廷降鹽鈔實邊歲以萬計謂之軍前鈔至則先
次給鹽不與他鈔一律商旅爭欲得之歷歲既久或以
供互饋者相師成習無復本意君痛革前弊募人運米

塞下閱月八九積棗陽米十五萬石而本年之鈔不與也州縣以丁夫運糧素無定籍臨事調發姦吏司其柄貧富異役怨嗟載道即為斟酌定列為三等每制司大舉入敵境隨軍應辦未嘗乏事值調發益急不以攝養為意六轡督運衝冒霜露越明年得旨奏事行在所而君以疾告矣大聲抗章以歸田為請得主管華州雲臺觀改建康府崇禧觀病革乞致其事以嘉定甲申十月望日卒於正寢享年五十有九積官至朝奉大夫娶陳

氏朝奉郎池州通判諱柜之女封宜人子男二人曰有大曰有立循謹有家法皆當受命孫三男一女皆幼昔修撰公以直諒受孝廟深知執事殿中掌醑冑監又攝貳儀曹事衣繡乘輜軒持使者節為乾道淳熙間薦紳表儀君雖未冠猶逮事也奉直公議論峻勁詩文清駛辭官不受凜然晉宋間人物見聞觀感自不與凡俗等流風遺烈鍾于崇禧君故其事親以孝聞處諸弟以友愛著其學也有原其居官也不苟愛賢則如暱治民則

如傷丞相葛公邲京公鏜與觀文趙公彥逾端明趙公
方皆愛重薦引之本江州湖口人以先世葬南康乃卜
居城下一堂之外前不可以領客後無燕息處倚伏臘
於祠官之廩食且不足其卒也幾無喪具二子將以十
二月丙辰葬於星子縣清泉鄉廬山凌雲峯下凌雲庵
之側以銘為請余嘗銘奉直公矣尚忍銘其子哉辭不
可則告之曰受任先烈古所貴科目第云身自致崛起
題名誇出類無所取則吁可畏崇禧家有清白堂祖風

直諒禰好義拍滿醅醐宗廟器歸而求之有餘味謂寔
為常侈則媿之死有身無葬費若昔部氓今投淚甘棠
不到門無吏足矣報國猶不翅刊此銘焉可百世

李左藏墓誌銘

改慶元之三年歲在丁巳冬十一月庚申故提轄行在
左藏東西庫李君葬于南康軍都昌縣黃金鄉梅坑之
原前葬旬日其表弟曹某有千里之役哭于柩以告別
左藏之三弟曰景東曰景源曰景恭合辭言曰吾兄之

喪吾從兄樞密院編修官欲表其墓矣今日月有期而表文未至掇其要以藏諸幽有不可廢者子行雖速吾從兄之事宜莫如子詳盡書其事某雖不敏敢撫實而言之江州湖口縣南安李氏八柱國之一也派別於唐季而族居於五代隱德於國初而復顯於中興之世當其曾祖居士諱舜申妣黃氏時固以盛德雄長鄉里及其祖承事公諱麓妣沈氏始以教子作效考通判公諱知幾妣孺人曹氏尤欲以詩禮用光前人業曹孺人四


子皆賢而左藏公居長四試禮部未三十而登進士第
是時承事公尚無恙通判公改秩欲作邑編修官同祖
兄弟也亦以賢科相望祿仕李氏之盛駸駸乎古者衣
冠矣左藏既注黃甲授迪功郎調筠州司戶參軍滿一
考而丁曹孺人憂服闋調漢陽軍司法叅軍滿二考以
薦者循從事郎丁通判公憂又服闋調辰州沅陵令滿
三考又以薦改宣教郎調吉州廬陵知縣再遷承議郎
又以薦者授中都官乃除提轄左藏而即世矣生於紹

興癸亥十二月之除夕卒於慶元丙辰二月之中澣其
生也皆畏而愛之其卒也則疑焉而皆不信及其信而
後識與不識皆涕泣又至於今且久而鄉黨之親戚朋
友歲時會聚言左藏之事莫不冤其死者非其不考終
命也幼在襁褓未嘗好弄稍長讀書嶄然頭角事父母
未嘗失歡心平居未嘗有怠容處兄弟無絲粟間言和
長幼不異蓄產居喪合禮則治家有繩檢人有不及表
裏殫盡面別是非聽者不怨人有緩急不啻身受輕財

重施不問踈遠及其出仕所至有稱事上官則無不受
知處寮案則無不盡情諳熟民事明清獄辭兩入掾曹
諸臺郡守莫不倚以為重在沅陵時鄰郡有訟不決憲
臺擇賢至越三尺而以命君比至一見生死判別廬陵
號江西劇邑事煩賦重剗撥三年當路相慶前宰益國
周公廣陵葛公連剗公車遂登朝路幼學壯行可以無
媿而又對客舉酒未嘗沾醉早失伉儷旁無女御人物
偉岸議論宏達謂宜壽考可以儀表士類擢官中朝未

及眊卽而微疾屬纏享年五十三而止此公論之所以
歎息恐為善之不足以勸也左藏諱景範字器之娶蕭
氏國子祭酒諱之敏長女亦有婦德前卒子男三人曰
嚴曰邁曰克皆肄舉子業端恪恭敬凜有父風女二人
長適迪功郎筠州新昌主簿歐鑑其季在室某既奉命
以銘而其事節目銘所不備可以詔告後來者則又
有編修官之表在乃先銘之曰立已可以力行臨事可
以義爭至孝可以悅親強仕可以成名至於規矩以保

身乃不得以久其生人而不夭天而不人



欽定四庫全書

集部

昌谷集卷十九

二十九

詳校官庶吉士臣吳烜

主事臣呂雲棟覆勘

謄錄監生臣黃維

謄錄監生臣范重榮

欽定四庫全書

昌谷集卷十九

宋 曹彥約 撰

墓誌

蕭景仁墓誌銘

景仁諱顓國子祭酒蕭公諱之敏封太恭人頃氏之次子也淳熙五年今資政殿大學士趙公為南康守開府之初會僚屬言曰吾早識祭酒蕭公景仁又其賢子祭酒公既歿聞景仁欲以所得官遜兒子而州縣弗敢言

吾懼無以成其美也上其事於朝景仁得不補官當是時天下之賢士大夫舉手引領思所以激頽風而感動人之善心者以景仁為何若人也某六歲時已得拜祭酒公以公與先君善而哭其喪也八歲得見景仁於親戚李氏家二十歲而得娶祭酒公季女登蕭氏之門聞祭酒公與景仁之事最審景仁制行與祭酒公節目小小不同而得祭酒立已之要未有如景仁者祭酒公早孤事二姊以孝與弟郢州通判公友愛聞於親黨景仁既

克事其親所以事通判者猶事吾祭酒公也祭酒公且
老有田數十畝每以分給姊弟景仁治農事走田里甚
苦與兩家兄弟均其貧乏至不能自給祭酒公以剛毅
立朝孝宗皇帝思其直諒見於聖語抨彈風采聞者膽
喪景仁持月旦之柄唯黃人物面與人相失不歉也祭
酒公初拜副端即論事以出典成均酌朝士第且將持
橐時當肆類漫不為景仁計毅然退勇同列不能奪景仁
視一官未嘗與人商推既得所欲怡然無一毫勉強

意志尚端嚴有祭酒公遺直稍留意詩筆即合祭酒公格律識與不識知其為祭酒公賢子也景仁有兄而早即世有弟而年齒不相若中年幹蠱祭酒又樸儉故景仁之用力也勤而其覺衰也早至甲寅乙卯間病已侵矣會有以導引之說言者景仁時亦信之過其弟婺源知縣碩官舍因道訪方士甚款既款而歸裏一歲之糧且將復往與親友會聚時常言我明年當不出今已當別一日東行李買舟而上泊南康城下訪所親邵良子山

書館謂子山曰我有大事欲來投子子山未悟也對榻而卧中夕呼子山甚亟起而視之已不能語子山善護持之復舟載以歸越六日而逝則慶元丁巳十二月之十三日也年五十有八景仁學導引時其實已病與方士言其實無所損益顧景仁方寸素明故得知其病病既草而又知其死以為因學方士以死固不知景仁或謂其知死為有得於方士則又惑也景仁大抵天資高篤於自信與物易忤其清心外物若與方士者合至急人

利害奮其身不顧博愛實能要不與為我者同道世或有不知耳家本江州湖口人先世咸居南康之都昌徙居湖口邑下則自景仁始娶劉氏耒陽丞諱漸之女閭內有法祭酒公太恭人皆以為賢祭酒之考諱固贈朝散大夫大夫之考諱仲山景仁三男子必簡必端必復必簡為修職郎郴州司理參軍以謹慤受上官知交薦公車必復為兄穎後與必端俱習舉子業不碌碌女二人適胡瑜李日嚴皆名家子有學術孫男二人有大有

立將以己未正月丁酉葬於彭澤鄉加堰里漕湖亭子
山之原前事數月景仁諸子嘗以銘文為言矣某辭曰
祭酒公通判之銘丞相周公葛公實為之近歲太恭人
之葬今丞相京公典書其事則銘景仁也必有大手筆
如三公者辭數四矣距葬且半月復得婺源君書以日
月有期不暇走遠介謂某聞祭酒公與景仁之事最審
也必使之銘而不可辭乃銘之曰孤竹二子聖許其清
忽諸不祀未免近名有祀不餒漢劉鄧丁雖微中道庶

幾典刑鴻愷太尉彪沒太傅始辭其卑弗辭其富孰如
景仁孝友肫肫苟利弓冶崇素安貧陶唐氏之民歟

蕭景蘇墓誌銘

祭酒蕭公三子其二早世景蘇其季也讀書究本末善
屬文溫恭禮遜井井有典則居官不忤物乃以辨治蓋
其事親從兄居家已理移而為吏無往而不稱宜壽考以
大其家年過半百有二而歿君子於是謂沮善矣昔我
先君司理與祭酒公友善兩家各生子每命名率多胎

合余年在蘇下自戍而丑其命名亦相若鄉人至作詩
歌之以為宜婚姻也我先君即世不肖子未有所立祭
酒我豈立朝以其子妻之故景蘇與余也少相狎長相
愛又復締朱陳之好則銘景蘇者或以余為可余安得
辭雖然自從官以來得款曲於景蘇者有數矣同時到
銓曹皆得一尉余尚待建平次景蘓上蒲圻拏舟送之同
寢處三數日說從政發軔事莫逆於心有疑義輒刺口
問難乃兄景仁在旁舟扣舷稱快間一年余過鄂渚今

資政殿大學士趙公彥逾太府卿商公飛卿在焉二公
早有雅望重許可人物說景蘇廉謹有家法且善公家
事守貳皆敬愛之又二年景蘇上印過余建平粗問蒲
圻政纖悉績密不為驚人可喜事而其戢吏愛民儼若
一律既再到選岳陽法掾國方大卹丞相京公鏜時為
宰士選授金國報謝使景蘇以親屬從議北燕不當舉
樂與京公合據經執禮衆不能詰歸湖口道其事且有
源委當京公歸報時孝宗嘉歎良久第公增秩景蘇當

改注美官奉親急祿非所願也滿岳陽秩用薦者改京
官調宰海鹽以內艱不果往復調宰婺源余往來湖湘
間不與景蘇偶別八年而過婺源觀其邑政又問岳陽
事自言事兩使君不專治三尺一職每以幕畫相倚重
了民間不結之案不知其幾有相承數十年者郡庠闕
博士命景蘇攝其官辭以故事不獲郡人士合詞以請
且將謁諸臺不得已乃受其名不食其祿有司治錢糧
正錄督程課郡不能奪識者稱題婺源地大民夥以獲

湯名東南縣齋榜曰止沸士大夫以柱後惠文治之其
士愈謹其民愈健景蘇下車不設備接之以禮如平居
無事有犯者亦不貸莫敢毀侮聽斷從容洞達情法有
頑民終訟欲反其說處之以和無所憤嫉健吏欲舞文
求之卒不能改好事者彙為一編質諸老成究其指歸
以教化厚俗為先務歲嘗小歛非水非旱百姓抱苦無
所告訴景蘇得其隱瘼為部使者道其事使者壯其言
獨得薄輸不與他邑等又二年余在樂平及與景蘇修

鄰好叩境上所聞與所親得不謬居則邑人誦之去則
思之郡太守露剡薦之方伯部使者王人董餉者連剡
上之值京公當軸以嫌自列調通判寧國府道出樂平
留四日輒求去自是與景蘇別不知其寧國之政也會
辛酉貢士寧國官屬有校試旁郡者過樂平稱貳車賢
德甚都大府所恃經總制積弊已久書逋籍以累萬計
景蘇理其侵漁證虛額非是以整辦聞寬諸邑無所苛
取去年冬余自江西護帥印東來始與景蘇相見於鄉

郡事有期程留我飯不能得浮我大白卒爵而不得酢
問所以則曰臟有毒痰每暴下輒不止余相從久知景
蘇飲酌有度在婺源以縣事為重竟歲至不舉酒今又
止飲知甚自戒嗚呼不知其止於此也今年夏余歸自
臨安江行過湖口問景蘇則曰已矣為古人矣問其病
如去年所謂耳其人有令德不使之永其壽其先人有
名德不使之顯其世其為病又不足以死人而獨死之
將何以解說於善類也景蘇諱碩曾大父諱仲山妣徐

氏大父諱固贈朝散大夫妣宜人彭氏考諱之敏朝奉
郎國子祭酒贈朝散大夫妣太恭人項氏本江州湖口
人近南康境上彭宜人始葬都昌祭酒公登第也以南
康薦景蘇受遺澤亦南康上其事今卜居焉家世儒學
至祭酒公始著立朝以剛正聞家有文集有奏議國史
有傳景蘇前孺人京氏宣教郎贈太師衛國公諱祖和女
無子今孺人周氏通直郎江淮宣撫使司幹辦公事特
贈承議郎鳳谿先生諱燭女子男二人必學必則自十

七年至十二聰悟皆過其年女二人以余子况為長壻其季未許嫁景蘇孝友出於天資誠實粹於外貌居膝下得父母懽心祭酒公所至每以自隨烏府密奏多其手書任以牋翰不為點竄米鹽細務不升於堂兄弟會聚處無景蘇則不滿意事有難處經景蘇剖析輒不異議從先生長者游即稱道不置口行輩羣居愛之而加敬臨幼賤上恩意畢備所至而去人懷其德釋婺源六年有如父母之謠未已御史因事及之至達天聽來南

康未久出多於處其亡也無不駭數寒暑變矣猶若有
所失生紹興中丙戌之四月卒開禧乙丑五月之六日
歷官自迪功郎至奉議郎為尉掾宰邑丞郡至待次點
檢贍軍酒庫所主管文字始居南康時負郭田未有尺
寸得林地數十畝以供薪爨鄉曰清泉山曰福源去家
十里人以為便既卜兆龜筮寡協獨福源告吉將以其
年十二月庚申葬焉請銘之曰剛明正直其生不數上
下千載倒指落落漢誼黯舒唐贄愈蕢揭若日月其後

無聞惟祭酒公耿耿不朽有子而賢可以藉口既賢而仕天實德之既仕而窮天胡嗇之始時祭酒入棘出節旅櫬歸時片瓦徒設景蘇三遷築室未全負郭十里孰為此阡清貧再世家法一體國人皆曰幸哉有子天道茫茫何有亡惟此令德百世不忘福源有泉清徹廬阜景蘇之風永錫爾後

奉新知縣趙公明墓誌銘

公明姓趙氏諱炳江州德安縣人也始余淳熙辛丑與

公明偕計吏以桑梓相接交刺於臨安旅舍奏名解褐
與公明同年生時孝宗皇帝以射藝試新進士與公明
考業貢院及選德廷試公明入上等因與余同注黃甲
公明意廣氣銳倉猝無可擬闕余閱選榜得池州貴池
尉以告公明強之使就又年與公明會江州同游廬山
馳馬太一峯下相與甚歡然未知其官業也又三年而
過貴池則公明之秩將滿問其言本末具舉考其行事詳
練精審與常時大異其後余官湖南又外移湖北公明

為平江府崑山縣丞又為郢州長壽令別公明而不見者十有八年嘉泰壬戌余來入江右帥幕公明始改秩知隆興府奉新縣以職事謁府得相見叙平生而公明之病體見矣懇懇道邑事若未病時越明年而來告喪又明年而來告葬則誌公明之墓而銘之安可辭也公明蚤歲而孤以力學取勝場屋致戶外之屨凡所以立身行已當官涖民一皆出於意見無所依附所至以辦治聞不肯碌碌出衆人下在貴池時盡力水利以便百

姓得盜賊不肯受賞戶部尚書張公抑時為常平使者以公明為能上其事公車因得增秩在崑山時以學校為已任課諸生事業牛腰吏牘剖析如破竹參政袁公說友時為郡太守以公明為能首剡薦之不使一日去幕府在長壽時一意以民事為念救荒賑窮尤無遺力吏部郎中魯公三聘守郢寶謨閣待制程公九萬又襄陽帥也未嘗有介紹爭欲令出其門下起孤寒得陞朝籍所向輒自行其志上官皆賢重之處今世不陸沈選

調如公明者蓋寡奉新為豫章佳邑前宰往往卧治亦
不廢事公明小物必謹不忍少不便於民簿書期會必
欲自立機軸日不足繼之以燭雖祁寒暑雨不釋也意
自樂此飲食往往失節浸淫成疾役役以死而不改其
度生於紹興甲子四月之癸未卒於癸亥十月之癸卯
蓋明年某月某甲子而葬於奉新縣七里建康鄉之新
塘又家於其縣從遺命也曾大父諱真大父諱芹皆隱
德不仕考諱庚以公明故得贈承事郎妣李氏贈孺人

公明娶蔡氏又娶高氏子男五人堅早卒基奎壘皆
聞詩禮女五人皆未嫁孫男一人鑄公明家世儒生無
常產以伏臘常自言其未第時蔬食菜羹以享其考妣
未嘗不流涕享畢即夫婦剖分受胙無不滿色居家廉
介自持不肯封殖貲產變素業為後日地至於死而不能
歸葬是可哀也而尤可銘也乃銘之曰貧者士之常何
足深計三軍可奪帥匹夫不可奪志惠愛所以卜鄰詩
禮可以傳世百世之風百世之祀奉新趙氏如桐鄉朱

氏

故利州路提點刑獄陳君墓誌銘

君姓陳氏諱元勳字彥功以祖任為將仕郎銓試入優等
授吉州永豐尉秩滿徙道州軍事判官丁內外艱服闋
調漢陽軍漢陽監以舉主當改秩辟知鄂州崇陽將滿
辟湖南安撫司主管機宜文字徙通判安慶府甫三閱
月擢知郴州歲餘又擢提點利州路刑獄公事兼四川
制置司參議官數月兼權知興元府事踰月而卒其在

永豐時訪境內水利得舊陂十有八所諭豪民併力疏鑿訖事不擾隄防既密水積益富用以溉田為頃二萬有奇在道州時贊州家簿正失陷推考顛末吏不得揺手郡太守坐嘯黃堂委政受成會旁郡零陵告旱流民麋至常平使者李公揖選才任荒政檄治其事則能深入溪洞家至戶到慰勞撫卹不憚勤苦借寺觀之租以為貸本薄關市之征以通商販或勸分以均貧富或賑食以增繕修穀直頗損民若有年使者欲上其事會憂

去不果在漢陽時常開禧用兵敵入郡境朝廷增鑄緡錢十萬倍於舊額區處鐵炭於此時最難分別工課井有條理正數既登更補前欠部分監卒與郡兵相表裏薦員溢格又第功增秩在崇陽時軍嚴未解其應辦糧草收買器械矯積年之弊取足官帑事既不廢民亦不知造浮梁以便道路作叢冢以掩枯骨乞轉輸之粟以寬旱歲正鼠尾之籍以定差役在湖南時與聞捕李孟一事及分畫郵資興桂東三縣攝事議幕檄相隰原會

羅世傳叛徵復見即復任便宜事往來前後二峒部分
諸將賊既就擒乃得還局安慶未久旋即改命已規度
築吳塘陂工未就役在郴州時首與帥府定議撥緡錢
以助邊費激犒戍卒俾覘盜虛實則又增築州城併及
外縣貯穀粟以為備捐租稅以與民桂東李大成纔欲
倡亂已伐其謀治以整暇延進士類更行鄉飲酒禮風
示好惡會改除將去猶條上本郡三事欲選用守臣取
文人有風力不以武將異時本路使者有關於此乎取

又當兼郡事以壯其權飛虎更戍非經久之利欲招兵
移屯郡城以免虛費又殘破縣分雖倚閭官租無明制
蠲免後有貪吏必復取之民卷卷為郴民遠慮去之日
如始至其在劔外事無諸使疏別滯淹檢柅吏姦關表
告饑日議賑貸發廩輟俸靡不畢備會金人聚兵鳳翔
其意叵測則調護諸將力戒輕動帥事方倚重焉而君
已病矣上章告老朝論歎訝進秩一等已以訃聞其出
處大節如此若其孝友篤實輔之以學慈祥豈弟將之

以誠則又本本原原有不可掩者居官有深思若無所
可否遇大議論往往至此而定臨事剛決聞命即勇往
究其所就未嘗近功利廉於受俸不但無券外之須雖
添給所入亦置局以餉賓客與人交未嘗有忤意人亦
不敢干以私彌更耐久慨慕前賢所至訪其故迹歐陽
文忠公葬母永豐歲久墻垣齧缺為增築封殖訪其後
使奉祭祀張忠定公治崇陽有惠民至今稱之即討
論事迹著為年譜收拾遺文鋟為簡冊又顯設廟貌使

邦人尸而祝之柳之負郭邑為濂溪周先生舊治而祠
宇不稱牲酒不豐則又撤而新之合樂而祀之所至學
校改觀士類增氣他人以為故事而已獨以實行處之
其少也鄉先生稱其賢其仕也上官稱其政其歿也識
不識惜其早積階自迪功郎至朝奉郎未嘗求多於世
而以褒賞得者常居其半故知樞密院雷公孝友簽書
樞密院宇文公紹節前叅知政事衛公涇同知樞密院
安公丙端明殿學士薛公叔似與今禮部尚書任公希

夷或期以遠到或薦之重任或委以事權皆有著效其
他當路之所推許寮友之所歸重未易枚數生隆興甲
申卒嘉定丁丑六月二十有八日享年五十有四家世
蔡州之新蔡靖康避地南渡徙袁州之宜春今為宜春
人曾大父之純皇任朝請大夫知濰州贈金紫光祿大
夫妣蔣氏建安郡夫人程氏永寧郡夫人大父升皇任
朝請大夫致仕贈正議大夫妣晁氏碩人徐氏宜人考
公璟皇任朝散大夫知西和州贈朝議大夫妣駱氏贈

恭人三世以才德典藩至於君始持使者節皆清白一
機軸娶柳氏封孺人三子衍業進士衡衡皆將仕郎衡
出繼季父元老後孫女二人諸孤既護其喪以歸明年
十月丙午葬於信義鄉德成里貂石嶺之原祔西和府
君之側一如治命前事四十日遣使以張公右史嗣古
狀來謁銘似倒置也惟右史嘗秉筆立螭坳為天子記言
動豈應狀其事而不銘欲以此為解且媿不學令更窘
朱墨顧葬日已近有不及事之患念初兼領漢陽時郡

送迎新舊守卒不滿十錢不滿糴米不滿斛不踰月而敵已在郊雖決意死守而環視同列孰可共此事者彥功議論平正不畏不沮有慨然憂世心乃請命宣威俾與聞幕府事凡所以出郊逐盜與閉門捕亂卒置營寨招宣効選謀士守江捍城無役不預敵退戍撤彥功當脫選調適崇陽關令宣總司頗難其人即為宇文公言非彥功不可彥功得免班引徑領縣印予既攝事鄂渚又領常平使者事舉一道令最孰有先彥功者會繡衣

錢公文子適至首與合議共上彥功治效皆其實錄及改守長沙即欲得彥功入機幕聲言於朝朝論執歲月未應不許伺彥功當滿復溫前議始獲共事其後彥功參選入都與通守安慶皆訪我廬山下留連不忍去在劍外我雖異事猶及同寮歸未弛擔而彥功已訃聞矣蓋嘗六薦彥功於朝自改官陞陟之外更四露章無論叫號於士大夫間也葬彥功而不銘其將何辭乃銘之曰賢哉乎彥功不媿姪以取容不激切以稱雄其不忤

物似通莫當其鋒心平而不尚同事定而不留蹤可以
守中可以折衝以清白始終古君子之風賢哉乎彥功
朝議大夫直煥章閣范季克墓誌銘

嘉定己巳余被命始得節湖北適歲種不入土民旱告
諸郡講求荒政置局賑卹擇郡僚主局事必賢而更練
者常德在庾臺之下尤所目睹郡以錄事參軍范君季
克主斯局積力强敏心志惻怛凡一郡四邑道里之遠
近委積之豐耗百姓之貧富戶口之多寡本末毫釐無

不洞究姓名等第率皆默記有訴有求隨至立決郡無失事民如有年職在諮詢亦免曠職予於此時知季克之為學一意民事而不在乎其他矣季克姓范氏諱仲武初字仲烈後乃改今字家世隆興府之豐城曾祖大興祖英右承務郎致仕父人傑從政郎衡州常寧令自常寧公始卜居高安今為瑞州高安人季克生有異質讀書過目輒不忘十二能屬文所學有根柢稍長蜚聲場屋遂冠倫秋賦登慶元己未進士乙科主臨江軍新

喻縣簿邑大事繁吏緣為奸版籍改更不可稽據强者
詭寄規避賦役弱者受楚無所控告季克推求弊源剔
除吏蠹縣受其利催科不擾歲丁大侵任賑卹之責勸
分移粟井井有條貧民既被實惠而豪家大姓未嘗有
擾秩滿調常德府錄事參軍所謂賑卹局事者特其一
耳沅江有未行之盜為縣所獲其令欲夤緣推賞掠使
誣服以為欲劫倉庫據縣以叛季克職在審勘察其夸
大以本情平之令肆謗言撼不為動改秩知吉州太和

縣民訟繁夥素號難治適有秤提楮券之令所在奉承
太過以深刻相尚季克不忍行一切之政視如常時錢
幣通行入自按堵思昔為是令者其人物出類莫如黃
太史公庭堅訪其舊政遵而行之著效烜赫人無間言
當癸酉甲戌間金人窘於韃靼奔竄古汴使介不通其
意叵測山東遺民方款塞不絕朝家急用文武求之如
弗及夙知季克才不俟太和秩滿擢通判安豐軍伴任
邊事始至即周視郡境咨諏耆老阨塞要害靡不詳究

歷歷為廟堂言之又擢知軍事首議擇將才招勇敢復武定軍以保鄉井廣行賑濟以固根本又以城濶難守縮減北壁既與戎帥同任其責更環之以塹以增險固改守涪州僅八閱月亦不遺餘力寬鹽課以優井戶尊賢士以勸學者改知嘉定府值關外用兵總餉者襲開禧下策斂四路免夫錢期限峻急一時妄庸欲夤緣趣辦求之民不堪命季克取辦公帑不賦於民時事益急擢成郡路轉運判官興元潰卒張福莫簡作亂於利州

劫倉庫焚城邑害及王人擁衆南下內郡久不知兵望
風洵懼制帥退保閬中檄李克節制本路軍馬即調捷
為土丁黎雅牌手及飛山軍扼資榮懷安之路與簡池
守各據險拒賊招戎帥張威腹背擊之多為乾糗以備
饋運藥餌扉屨輸送不絕官軍爭奮困賊於普之鐵山
其計既窮詐乞降以緩我季克力言賊不可信必須剿
除以伸國威以遏亂階賊既授首公論肆其議尤留意
人物首嚴科舉解試考官增給常費不假隄防盡草宿

弊及兩護類省試得行所學抽摘考校無異寮屬四路
知名士皆在選中至於接納後進表異英特大者薦之
於朝小亦量才授任若乃貪虐之吏則所素惡澄按不
貸沒齒無怨在蜀八年朝家倚重季克久當事任力勞
心勦丐閒之章陸續而上上方思見儀刑重於擇代始
則寓直道山繼復擢丞外府及乎召還表著方將大用
季克求歸愈切勢不可遏築室舊居以雲坡勒名異卉
喬木徧植其中青雲白石乃其深趣舊得寒疾至此增

劇還家未幾竟不能起可謂知其命矣生於隆興甲申
終於寶慶改元正月乙酉享年六十有二訃聞進秩元
士升職堯閣蓋異數也娶黃氏先卒贈宜人子男之晉
今為從事郎郢州司戶參軍女一人尚幼之晉既以二年
十月葬季克於南康軍建昌縣卜鄰鄉烏溪之原乃以
治命持武寧章令君洪狀數遣使謁銘於昌谷余知季
克居鄉時受知於故知樞密院雷公孝友在湖北受知
於前參知政事曾公從龍故禮部尚書袁公燮今兵部

侍郎胡公槻其在蜀尤為閣學後溪劉公光祖所敬皆
非偶然者後溪聲言於朝以為料賊無遺策給餉無闕
事保守列城捍蔽兩川士大夫口傳耳熟謂無過譽又
作德星堂贊以為小范老子胷中甲兵不主招降卒用
賊平其主盟公論尤為可信事功如許余所親見當茲
衰晚之時疾疢交作舊時筆硯不復吉蠲諸方求者悉
已謝絕而獨於季克一意民事不在其他願贊一言固
非飾辭也人惟尊主則思庇民庇民則能尊主知天地

生民之意既已託之君師而君師愛民之責必須託之
官吏自初學以至於謝事一以此意為主則居官之際
與民一體獄不濫刑財不妄取捍禦而得其要患難而
知其權輕利重士皆自此心發見故知一意民事乃其
所學也季克自太和徙安豐道出洪府權帥聞其政聲
也置酒從容扣問在縣日施行本末季克為纚纚言之
至蠲放貧民下戶餘稅帥色不怡聳身而言曰某於民
事無不盡意獨不以姑息為是且貧民下戶餘稅豈其

所自欠者富戶得產而不收攬戶得錢而不納若一一蠲放則此二者受惠耳季克乃言蠲放貧民下戶餘稅則富戶攬戶受其利誠如所諭然催之不已則受害者貧民下戶耳非富室攬戶之所憂也帥感悟稱善余聞擊節焉以為季克之於民瘼可謂明白昭徹矣其後宣司斂蜀財季克以漕計當其任不及下戶或謂大家巨室有詭匿為下四等者免數下四等戶恐非計也宣司惑其說將欲易轍季克言寧使富民有徵幸不可使真貧

弱者重受其困其議遂定以季克抱負如此發之於政見於行事謂之非一意於民可乎請銘之曰厥初生民立之君師宗子兄弟初無町畦孰為吝驕析而二之疾痛疴癢舉不吾知加之上位於民匪宜聖賢立教視為四支舉手搖足莫匪我私爾寒我慄爾餒我饑以此授職顏無忸怩以此尊主禮無闕虧季克為政端本羣黎講之以正處之以慈思昔秉彜不藩不籬取彼封閉剖決無遺外此節目皆其設施天與異稟孰疾其馳雖則

疾馳名徹四夷炯炯松柏柯葉不移雲坡如在心實似之

繆南美墓誌銘

繆南美既卒有官業可書其孤狀其事走介二千里語昌谷曹某而乞銘焉南美諱仲公永嘉平陽人舉今世能文章持正論雌黃人物未有多於永嘉者知南美之事既近則詳不應遠取矧如狀所云者今大參雷公秉政號嚴重頃持使者節篤南美有操守厭服士評近將

作監楊公簡以時望主畫諾永嘉揭月旦道左推許仁
勇不以屬他人事核而易載可以取重持此以謝其請
不為無說迹其所以來有端緒不可泥者南美困頓場
屋得官暮景歸鄉有善行力不足以及物主饒州樂平
簿當某令茲邑調郴州推官則某亦將輸此道檄來入
幕又當領帥事時平生執吏鞅僅有此三者所至輒相
值值即志相偶雖有能文章持正論者喜談而樂道之
則必考而後言質而後信未必身親履心敬服要且切

如此樂平弊於黠吏以詭戶愚百姓丞簿不惻怛反資以辨白直曲為囊橐役法顛倒禍及貧悴長官者掣肘不敢孰何解后丞職有關南美兼領其事議從所欲削吏輩一切科配繩以三尺姦計不得行協力著效併詐冒七千餘家邑庠舉廢養士以教導居職冠帶濟濟咸所推敬明年奏名禮部邑登善士既倍數常時又多執經行輩寇作於柳之屬邑稍及近郊齊民或落其手脅使執役不幸而為官所捕即以死坐郡每夜駭有職者

不救去無幾南美恪居官次贊畫城守又平讞無辜不
稍阿流俗既羣兇蕩攘遂與帥幕之議淡然無營不特
求解職而已引年自列遂得致其事仕塗顛末宜莫悉
於此若乃有所未知與所已知而未暇及者於狀有考
不可畧也魯繆公之後以謚為氏唐咸通中官於閩近
擇橫陽之地而居者其上世有諱文珂者其曾祖諱敏
以收方臘功補進武校尉隱居不調者其祖諱從才從
廣補通州助教者其考自迪功郎遷從事郎改承事郎

者其品官由主簿以入郴幕更帥幕者其任職生紹興
丁巳卒嘉定壬申者其享年靖康死義家有賢女黃氏
先卒者其配以猶子奉命入繼曰伯垕者其長子曰夢
巖夢履夢過者其次子以至其季子有家三人皆仕族
一在室者其女幼而未名二人者其孫曰清容俚藁者
其所居軒名與所著集曰親仁鄉燥溪之原者其葬處
曰癸酉十二月壬寅者其葬日也昔與南美相處久見
其撫四子一律又獨為長子授室不知其有非已生者

今狀言云云信其行著於家聲聞於鄉推之以了國事
厥有本末狀又言其失所怙早事所恃得懽心從兄無
間言兄沒則撫其嗣與人交不隨時冷暖平居謹戒寡
言笑終日如對大賓有某所未盡知者即其所可見以
證其所未知當如狀不謬又言乞銘本意則又皆其治
命諸子不敢違益不可辭也乃銘之曰士患立志難不
患晚得官患不吐其奇不患官之卑有志得行仁且壽
子學能文世其守屬續燭下死不朽嗚呼南美無憾矣

曹次蕭墓誌銘

君姓曹氏諱閱字次蕭初名隨讀書通大義即不事傳
注力學苦思率暗合先儒間出新意與世俗異議由是
屢試場屋輒不偶有司窮年燈火兀兀不自止既而嘆
曰親老矣求三釜不得又將併菽水之業而失之無以
仰事曾是以為孝乃誅茅結屋率僮僕治田事日積歲
累厨不乏供溫清以時既得所欲則又誘掖後進訓飭
子弟義理之學不事紙上語性剛直不阿附時好豪家

恃氣陵轢鄉曲輒不肯出其下其貧悴無告人所不齒
往往出力助之畧無難色強學力行率皆若此歷年六
十慶元庚申六月庚戌微疾卒於家是可紀也按族譜
龜山曹氏本宣州南陵人來都昌且數百歲世為儒家
其登進士第則自君祖雍丘府君始也府君政和間為
岳州士曹州有天慶觀最號富饒方道士林靈素居中
用事以其高第主之守貳奉承順指如意其犯法奪民
田漫不敢省一日府君攝州事杖而逐之以忤時好得

罪廢不復用會靖康獎忠直擢丞雍丘則四郊已多壘
矣感愴時事不得志以歿此其源流深遠所以遺後人
者雍丘之考諱通是為君曾大父雍丘之長子諱一飛
是為君考自曾大父至君四世皆娶黃氏二子忠輔忠
弼皆應進士舉宗族極稱之二女適檀和之黃維屏亦
進士將以癸亥十月十九日甲申葬君於江州湖口縣
帥家灣之原以銘來諭其實君三從弟又嘗從學則為
之銘曰學為仕乎將以行已乎仕為貧乎將以求仁乎

寧一其寒無寧失奉親之歡寧百吾謫無寧瘵愛君之
職退不叛道進不媚於時好若昔祖考惠我於無疆者
子孫保之